

晚

晴

移

詩

匯

晚晴簃詩匯卷一百三十七目錄

左宗植

十五首

左宗棠

十首

吳兆麟

六首

顧淳慶

二首

謝子澄

一首

符兆綸

八首

黃曾

七首

陳澧

四首

姚承豐

二首

吳敏樹

十首

鄒嶧賢

一首

陳樂光

一首

項鴻祚

三首

陳超

一首

溫訓

六首

言友恂

五首

汪元方

一首

孔繼勳

一首

焦友麟

二首

安詩

二首

吳昆田

三首

端木國瑚

十五首

許槌一首

許楣二首

張熙宇四首

桂超萬三首

沈映鈴二首

曹銜達二首

陳光緒九首

王錫九六首

姚承恩二首

徐維城一首

尹藝一首

徐子苓九首

姚燮十六首

楊廷桂一首

韓超四首

晚晴簃詩匯卷一百三十七

徐世昌

左宗植字仲基一字景喬湘陰人道光壬辰舉人官內

閣中書有慎菴詩鈔

詩話慎菴才氣縱橫與文襄同舉於鄉而慎庵哀然  
爲舉首聲名藉甚論學不尙苟同兄弟法家課徒歲  
晚歸各出所著相示竟夕爭駁不已家人輒溫酒解  
之與益陽湯海秋邵陽魏默深郴州陳雲心有湖南  
四傑之目文襄稱其詩尙僕已忘巧斯固信然顧其  
軒昂排奐實有不可一世之概也

初至新化贈張蓉裳學博

家集

我初試繙塵鄉貢赴京甸踏月款湘館始識先生面塵囊  
發鳴琴行篋誦詩卷清言似味蔗往往耐嚼嚥長安仕宦  
海倥傯預計選得官宰百里孥僕欣以忭庶幾抒夙抱盤  
錯利器見誰知達者懷自匿不可諫朝上投劾書暮授文

學掾酸寒古梅峒環堵壤不繕瓦吹風打頭牀漏夜易薦  
旁人或色難先生乃安便陶然斗室中絃歌雜諧宴閒吟  
七字詩號占萬象變雪風入牙頰歎飲出璀璨粼粼溪流  
清觸石蹙渦漩自然成文章足可醫汗漫觥觥歐夫子古  
處耄不倦縞紵半南北目歷幾宿彥獨喜從吾游款款似  
親串飄然李郭舟那願望者羨鯁生少爲儒兀兀事文研  
辭親學干祿妄想那能免歸來湖湘間習飛始斥鷃移家  
就冷署甘旨懼不辦差幸苜蓿盤臭味同所願惟慚論年  
學短綆及道淺祇有肝鬲間迂拙不自賤何圖君子知刮  
目及蹇鈍資西盛桃李簇簇花滿縣濂溪此遺澤望古想  
空緬懍然俎豆旁何術盥昏懦枉辱忘年契溫獎懼非分  
古人金石交頌禱寓箴勸歲晚霜雪零君軀幸保善微詩

聊以贄并用志繾綣

贈楊紫卿上舍

季鸞北行兼簡湯海秋鵬

泉林有佳士抗志凌雲霄  
艱虞鍊奇骨鬱屈成騫超  
我廬素心人邂逅非一朝  
清風江上來掃榻聯殘宵  
吟君春旦詩發藻親風騷  
誰言子雲吃乃擅太白豪  
諧談雜藥石飲我真醇醪  
嗟予久索居嚶鳴求其曹  
常恐志節墮日月加丸跳  
昨者湯海秋千里寄瑤瑤  
上言加餐食下言厲孤嫺  
今又喜見君有如漆入膠  
由來氣類感開懷樂陶陶  
願言數晨夕伊人永逍遙  
黃鵠忽遠別千里長安郊  
君才遇知音廣樂羅絃匏  
甯當嗑皇琴而不登琅璈  
文章雖有神誼道未云高  
眞契在千載努力各所操  
儻遇搏南子爲言田念勞

七月十三夜被酒登雙清亭道者送茶至

醉眼忽洗江風腥獨踏亂石眠石亭峭杓出壑夜龍黑幽  
塔刺霄孤劍青終古雙流有今夕三人明月自前庭道翁  
好惜秋江茗留著頻來款露局

舟泊銅盆湖寄別舍弟季高

征帆挂湘波客心搖風旗臨分不能別拭淚恐子知念子  
少而慙孤瘦惟我依與子雖兩身體具先人遺風塵浩無  
極惻惻不得攜有如邛駝虛食望迭相違昔爲湘中役泥  
塗沾我衣襟塵慙一摻又及河梁悲人生處沈困那得惜  
分離傾身爲飢驅默反良以歛何當辦茅屋白首同耕犁  
束牲盟伯夷薄俗不足讐奔車無仲尼植立要自求男兒  
不得意觸事滋盤郵晨興戒脂輦薄言遠行游出門忽迷

方四顧無可投鴟鵂鳴路隅狝狝當道周射工更潛景舍  
沙伺行斡亮無鴻鵠翅高騫謝凡憐挽身蹈塵趨奚適能  
自由往事那復道相望崇靈修

朝發碧湘門暮宿巴邱湖吾鄉盛風騷良日懷三閭龍舟  
截狂濤士女殷且都鉦鼓鳴淥水棟褭沈芳艸我心感佳  
節我行方遠徂以我戀家山知子懷征夫前年泣麻衣去  
年哭張嬭哀哀松塘兄宿草成荒墟仍歲骨肉恩酸涕灑  
欲枯死者宿草積生者搏沙如風雨黃陵舟殘鐙明菰蒲  
萬感并遙夕江流爲鳴嗚

將之襄陽贈周翁

山

衙池乾萍秋縱橫荒園曙禽催客行連檣三日造我闕破  
履蹋木聲彭鏗怪翁七十髮未白談琴讀畫有氣力長松



倚壑回春容老鶴盤霄健秋翮武昌城外長江流搏沙一  
聚風馬牛作詩贈翁翁憶我隆中山北峴山頭

谷隱寺

亂山圍古寺細路入松林踏葉聞僧語敲門響谷音石泉  
風磬落苔雪佛堂深坐久客魂冷翛然生道心

同人冒雨尋白兆山桃花巖中途雨甚小憩山寺被  
酒有懷太白

殘宵聞輕雷破曉辨游躅老筇動高興意行復誰促濛濛  
城西渡野水帶寒玉東風信馬蹏洲草萋已綠連畦平衍  
盡復岫嶇嶇續陰霾溼危空綫路瞰幽谷迴風吹雨來萬  
壑響琴筑平生謫仙人高歌在林麓粉房望咫尺不得騁  
吾足置此下山去山中酒應熟

我愛謫仙人不作謫仙詩我敬謫仙人痛飲眞吾師平生  
國士風餘事乃文辭堂堂汾陽公中興造唐基誰令翹關  
卒祓釋起囚纍赫赫高將軍指使如僮兒荊州逆豎子豈  
肯相因依觀名計之實噉噉固奚疑薦賢不受襪反以罹  
讒譏至今讀書處古柏號風悲我來弔君才亦不爲遨嬉  
狂吟酒一杯酌君君儻知

黎月橋侍御歸徐雜詠詩冊

論交少日各襟期相對而今鬢欲衰笑我平生元尙白憐  
君廿載素爲緇時危莫歎功名薄學短空驚歲月移何日  
比鄰結茅屋塘邊同理釣竿絲

京師九日同人慈仁寺祭顧先生祠呈同集諸君子  
有明三百年賢哲邁前世惟有經學衰末流益虛僞侈口

談性道枵腹薄經濟人才日猥下國步遂陵替先生百世

士生值明之季風雨自雞鳴松柏抗寒歲著述綜百家貫

穿天人際起例託洪

容齋王厚齋

精博拔其萃楊

升王弼

固不

論國朝亦少二閻毛猶屈強江戴乃孤詣斯文何漢宋通

儒自無蔽學古在於通貫是有公議潛邱五十條譎觚六

七事音學亦一端汀芒詎爲累學途有戈矛曠世一感喟

尼父當衰周微管筆褒詞諸葛佐孱蜀申韓亦可師立言

三不朽俊傑乃識時明祚昔云季綱維久陵遲籌兵無嚴

城措餉竭九釐薦紳鬪門戶坐視鼎社移東南踵敝化魯

戈詎能揮先生丁橫流蒿目時事非風尙許六代富強獎

秦隨大聲而疾呼用援溺救飢事去竟何及或爲異代資

海運終見行場鹽必改規其餘二三策善用多時宜事有

窮乃變賢者早見之迂緩與雜伯可笑忘詆諆

吾鄉王先生忠孝乃天寵間關寇賊中埋名落獠崗計脫  
父與兄艱危見智勇隆武顏殘曦蔽蔽采荒茸樓居三十  
年著書七十種學派得橫渠故訓翼鄭孔微言大義炳百  
世著蔡奉餘論斥天主背裂始作俑聖朝采遺書鑿楹出  
圭珙餘者三百卷攬束委塵塢雕版未能半望蜀財得隴  
先生與船山著述間伯仲所嗟生並世姓字不相誦九京  
如可作道誼金石重詎待歌滄浪魂夢勞傾動

今日已重九城郭秋氣爽雅游從羣賢載酒謁遺像平生  
書局隨席間劣函丈華檐芘髡緇藻井護龍象尙德抑虛  
無後死有吾黨云何禩二百社祭典久曠繁賴張與何祠  
構事草創青紅壞壁側三楹位東向羅拜十七人祭酒布

衣長精神感冥漠靈魄接恂恍想見兩度游白髮倚筇杖  
將身王尼車戴首逢萌盜沈吟述古作慘澹舊京唱空餘  
兩髯叟舊識孤鶴狀盡日號西風寒濤送悲壯

左宗棠字季高湘陰人道光壬辰舉人官至東閣大學

士封二等恪靖侯贈太傅諡文襄有左文襄公集

詩話文襄自言詩學不逮乃兄遠甚生平經濟見諸  
章奏文牘而詩極少誠不必借詩以傳然情韻氣概  
猶想見其緩帶輕裘自然風雅其燕臺雜感詩作於  
癸巳猶在公車西域一首卒踐其言方諸充國屯田  
之疏武侯隆中之對殆相伯仲

辛卯夏仲兄客武昌送別後卻寄

西風吹孤禽瘁羽身不肥人生奔車中志士無光輝憶昨  
別兄時盍旦鳴朝暉念當遠焉去有淚不敢揮開懷相慰  
語蹙蹙恐君悲攜手上河梁去矣何時歸別君未弔旬巨

浸城四圍項冥磨黑幟闖浪堆頗黎日月澹無色蛟龍專  
其威哀哉澤國民倏忽阡廬非傳聞鄂渚閒井竈嬉魚龜  
念君不得往如飛鳥黏鰲嗟予少嗇祐孤露惟君依三年  
客邵陵相見時亦稀貧居豈能久誰復惜分離華顏苟無  
凋白首終可期塵衣纔一洗忽復載行旗江湖阻修遠我  
懷君豈知蛟龍勿君基蝨蟻毋君危一家盡死喪君我先  
人遺念茲并百憂泣涕以漣而晨之西肆卜默禱煩靈著  
遂遇離之九卜士詳其詞積陰臨陽曦陰險陽則夷行者  
遇此兆上吉莫如之憂思積中腸欲信旋復疑歸爲阿嫂  
說征途亮無羈阿喜蹠蹠來強索紙背窺鬱鬱低自語對  
此增感歎湘水去悠悠大別山巍巍顏色不可睹況復音  
書希故山有黃精野澗多蕨薇何當早歸來與君共耒耜

癸巳燕臺雜感

西域環兵不計年當時立國重開邊  
橐駝萬里輸官稻沙磧千秋比石田  
置省尙煩他日策興屯甯費度支錢將軍  
莫更紆愁眼生計中原亦可憐

南海明珠望已虛承安寶貨近何如  
攘輪詰俗同頭會消息西戎是屠閭  
邾小可無懲蕞毒周興還誦旅獒書  
試思表餌終何意五嶺關防未要疏

青青柳色弄春暉花滿長安畫掩扉  
答策不堪宜落此蘇句壯游雖美未如歸  
故園芳草無來信橫海戈船有是非  
報國空慚書劍在一時鄉思入朝饑

二十九歲自題小象

祇恐微才與世疏聖明何事恥端居  
河渠賈讓原無策鹽

鐵柜寬空著書學道漸知箴快犢平情敢妄賦枯魚幽閒  
歲月都無累精舍優游樂有餘

機雲同住素心違堪歎頻年事事非許靖敢辭推馬磨王  
章猶在卧牛衣命奇似此人何與我瘦如前君豈肥來日  
連牀雞戒曉碧湘宮畔雨霏霏

兄所居五代馬氏  
碧湘宮廢址也

### 陶氏園聽彭山人琴

山邊亭子花之陰癘仙開囊調素琴洞庭秋老葉初脫夜  
壑春深龍一吟中有羲皇不盡意世無夔曠誰知音我家  
湘上水雲窟歲晚鼓棹來相尋

### 催楊紫卿畫梅

柳莊一十二梅樹臘後春前花滿枝娛我歲寒賴有此看  
君墨戲能復奇便新寮館貯瓊素定與院落爭妍姿大雪



湘江歸卧晚幽懷定許山妻知

題孫芝房蒼筤谷圖

湘山宜竹天下知小者蒼筤尤繁滋凍雷破地錐倒卓干  
山萬山峴子規子規聲裏羈愁偏有客長安歸不得北風  
吹夢落瀟湘曉侍金閨淚霑臆畫師相從詢鄉里爲割湘  
雲入湘紙眼中突兀見家山數間老屋參差是頻年兵氣  
纏湖湘杳杳郊坰驅豺狼避地愁無好林壑桃源之說誠  
荒唐還君茲圖三歎咨一言告君君勿嗤楚人健鬪賊所  
憚義與天下同安危會縛湘筠作大帚一掃區宇淨氛垢  
歸來共枕滄江眠卧看寒雲歸谷口

題顧超秋山無盡圖

行盡秋山路幾重故山回首白雲封阿超知我歸心急爲

畫江南千萬峯

吳兆麟字書瑞號筠軒錢塘人道光壬辰舉人歷官江  
西鹽法道有鐵花山館詩藁

臨沼關感事

劇盜窺三輔雄關時百尋宵行臣道苦薄譴主恩深鳥雀  
荒原下莓苔斷堞侵凋傷惜元氣搔首感難禁

秋日感懷

長空嘹唳雁飛鳴傑閣登臨四野晴庾嶺南來浮積翠大  
江東去作秋聲艱危孰展匡時略儕輩能成後世名我欲  
釣天尋舊夢蒼茫雲樹隱蓬瀛

征調頻煩杼柚空瘡痍調護賴年豐歌興瓠子河流闊浪  
溢蒲昌海氣雄三輔涼風摧落葉九重天語問哀鴻流民

安集誠何策都在宵衣旰食中

懷柔德澤被荒遐大舸高檣海市譁蝸角紛爭來卧榻鴟  
橋列戍動寒笳重泉未息元衡恨使者方乘博望槎回首  
天涯饒涕淚木蘭秋老暮煙斜

漢家宮殿接蓬萊別苑芙蓉迤邐開金闕彩雲聞鳳吹玉  
河曉日飲龍媒緣邊鼙鼓催征檄珥筆鄒枚問上才何限  
雄心倚長劍劫灰飛處有餘哀

洪忠宣公祠

十五年爲異域行冷山風雪最淒清敦槃莫解千秋恨桃  
栗空傳五國城世有健兒憐義士天教瘴海寄餘生山祠  
未比麒麟閣不惜丹青繪子卿

顧淳慶字古生會稽人道光壬辰舉人官瀧關同知有

鶴巢詩集

還家

旅夢猶京國歸程已越山  
津亭銀杏步煙水鐵林闕鄉樹  
中流辨征雲極浦還上音經耳  
熟入聽足怡顏

俊秀憐予弟艱難悵女嬃昔年  
雙淚別此日一樽俱問字  
奇同賞談詩興不孤老親寬大  
慣相顧轉歡娛

秋日南湖卽事

樓臺宜雨復宜煙一片湖光抱  
鏡圓錯怪鴛鴦飛不定蘭  
橈催動采菱船

謝子澄字雲舫新都人道光壬辰  
舉人官天津知縣殉  
難贈布政使諡忠愍

詩話忠愍以咸豐壬子率吾縣明年  
癸丑秋粵匪北  
犯自滄州入縣境至城西稍直口  
忠愍素得民縣有

張錦文者慷慨好義具饑餉出回民劉繼德於獄號  
召得數千人忠愍親率以禦寇大破之斬其渠城乃  
得安改稍直口爲得勝口紀功也是時勝保克齋以  
侍郎督師逐賊至獨流檄忠愍從軍冬與寇戰忠愍  
率先陷陳被七創赴水死有衛役于鵬龍者從入水  
越日其尸負忠愍出而如生事聞得優卹吾縣民建  
祠西門外祀忠愍歲時祈贊至今不稍替傳鈔  
得一詩亟錄登之中有攸字仍之以存其真

壽魯詹先生

先生浩氣難馴伏太華峯頭盤雕鶚金眸一閃落平蕪狐

兔縱橫遭殺戮憶昔扁舟出錦江

庚子夏由成都送別

便乘江水訪

湘竹一過淮南眼轉青平原煙月盡臣僕詩酒豪華年復

年洛陽花好不思蜀列侯賓客恥吹竽末路英雄悲擊筑

慷慨自負勝侯嬴逢迎何故舉王勃北顧燕雲將相多輪

蹄滾滾輕塵馥伯樂云□□□風郭隗已去臺誰築大材

天地爲安排梗楠杞梓無朽落齊王棄之楚王收不用庸

庸巧推轂那意如我之疏慵得與先生訂心腹永安一榻  
風雨偕暮酒蕉窗同翦燭江頭江尾是鄉親健筆驚人尤  
折服今逢五十加三辰可惜荒衙難暢欲不然越豔與吳  
姝鸞笙鳳管絲間肉妙舞繁音鎮日歡銀箭金壺夜漏續  
介壽區區酒與詩書生取巧猶不俗醉來卧聽春風狂吹  
放紅桃芳草綠

符兆綸字雪樵號卓峯居士宜黃人道光壬辰舉人歷

官福清屏南建陽知縣有卓峯草堂詩鈔

詩話雪樵詩自據性情獨往獨來經緯變化兼備諸  
體於五古尤長與江提相得提刻詩集雪樵力助成  
之贈以詩云忍住飢寒向賦詩天涯相見此何時豈  
惟吳越憂方大遂恐東南勢不支萬種愁深聊自寫  
千秋事重與誰期眼看如此平生了尊酒  
逢場且莫辭兩人身世之感慨乎言之

首夏雨後過歷山

山澗過微雨石路纖無塵  
麥氣入初夏餘花猶戀春  
泠泠一泉落屈曲山之根  
乘興無近遠延沿窮其源  
山靈有眞契不厭我來頻  
忘情友麋鹿我本山中  
人

渡易水懷古

黯黯日欲暮蕭蕭風正寒  
策馬渡此水荒荒路行難  
虎狼肆其虐髮怒上指冠  
吾志縱不遂吾事則已完  
劍術亦小技負義非所安  
悠悠論成敗千載空波瀾

苦寒行

朔風捲水水倒行三日不抵臨川城  
天空野曠人煙斷滄波浩浩孤舟橫  
回首白雲凝不飛憶昨長跪牽爺衣  
爺年漸老兒遠去膝前誰問寒與飢  
欲語妻孥轉嗚咽十口從此隔風雪  
已憐長安不易居更堪貧賤難爲別  
十年琴劍

西復東三百六旬如轉蓬出門卽是客遠近將毋同何獨  
此別心忡忡江上嚴寒晚來作呼僮煥酒斟復酌醉不成  
歡卧未能坐看紛紛雪花落

後苦寒行

去年逢苦寒游子初辭家今年逢苦寒遠在天之涯苦寒  
苦寒豈有極側身天地長咨嗟朔風怒號氣凜冽關山凍  
合草木折北方九月卽飛雪紛紛爭羨雁南翔一叫一聲  
腸一絕我獨冷落海岱間畫角霜笳助鳴咽黑貂裘敝已  
不溫紅爐樺燭難具論人生窮達自有命何必奔走拋田  
園吁嗟乎但能高枕卧山谷抱書忍飢吾亦足豈肯風塵  
長局促高歌行路難淒楚復淒楚魯酒不忘憂齊竽奈何  
許奮飛苦未能道路長且阻望雲日日思老親老親還念



遠游人居家行路同苦辛艱難十口待此身願天爲我回  
陽春

游道山佛寺登鄰霄臺作歌

浮雲挾山山不移嶄然山碧無雲時紛紅駭綠塞澗戶歲  
寒特厲青松枝城南鼓鐘若喚客數來見佛低雙眉此間  
自具正法眼參禪卻恨無眞詩登高放眼望大海日堆萬  
頃紅玻璃時時波濤奮欲起遙知其下蟠蛟螭不覺此身  
渺一粟到此有詩安敢奇更憐眾生昧塵劫惆悵刮膜思  
金鑊此子本非自了漢向人饒舌津梁疲臺高去天不數  
尺手招元鶴來下之長星勸爾一杯酒乘鶴東去尋吾師  
安期之棗如瓜大餽人一飽長無飢嗚呼此棗一飽長無  
飢鼎丹竊睨胡爲哉而況秦政漢徹非仙才

惺園弟歸里詩以送之

此去宜無恙重逢未可知一杯和淚酒滿篋憶家詩委地  
孤花早歸山倦鳥遲空堂風雨夜想有夢來時

憶家

歸夢時尋水上村年時憔悴不堪論梨花暮雨清明節楊  
柳春煙白板門見說驅除存盜賊可能安穩到雞豚獨持  
麥飯空惆悵一例人間是子孫

水口感事

依舊春山叫畫眉小樓無語捲簾時五更寒雨醺醺夢三  
月東風楊柳枝早已傷心到金粉忽驚滿眼是旌旗再來  
門巷知何似莫問飄零沈亞之

黃曾字菊人錢塘人道光壬辰舉人官香河知縣有瓶

隱山房詩鈔

詩話瓶隱極意爲詩平日凡拈一題有俗客來不作在簿書旁不作非有可傳可誦之句亦甯不作也詠物詩時有寄託措語極工如楊團云升沈添世感清白謝人打條冠云楊休分膏篋經綸借箸工饒頭云舊夢抱千箇浮生土一邱皆妙

苦寒行

羈光照樹潛雄虹靈烏遁入牽牛宮人家爭啟暝鑪會一十二時烏獸紅束縕不溫愁脫趾綠醺無功老裘死凍陰閣雨雨不流一角頽檐夜生齒書生編項縮窗下青鏡笑人鼻如赭梅花招我豈不行北風哮闕作虎聲

紫陽山飛來石歌

紫陽山頭境勝絕何年飛來石兀突坤靈盤礴螭腸結離龍當門骨爲熱苔衣簇繡色光潔棱棱秋氣霜華刷精英

內孕靈髓澈尖風作勢欲頽頽初疑越陽老松變倏忽虬  
鱗莽莽蟠孤窟又疑玉繩結解星精跌太白峯頭張兩翮  
不然武城一夜震雷拔驚起鷹頭出山穴又不然作橋填  
海秦法烈神人鞭石石流血點者逃之作吮嚙游人摩挲  
認瓊蹠之以足勢欲活石似有言不能說神耶妖耶雨  
無決君不見霜鴻雨燕非頑拙常山鵠印是誰掣天地精  
華受自物混沌有竅石有魄觀此令我疑頓析手攜蕉片  
坐幽凸芳蘿繫翠煙痕涅夕影鴟翻紅一抹

古劍歌

鐵花入土土花語欲龍不龍笑蟄汝精芒夜斂鵬鵠寒欄  
樓嘒煞青楓雨鋌鋸一鑄離宮愁犀棱兩面誇純鉤大刑  
小刑作虹起拔鞘欲舞天爲秋劫沙攝匣匣已空黃金聲

價悲雌雄自來神器久淪落利用翻讓鉛刀功杯酒英雄  
評得失鐙前重握千秋血手掬西江一摩拂紅吐空山霹  
靂舌

游天宮寺

溷水溶溶接上方欲祛塵累扣禪房清鐘響落諸天月老  
樹寒經五國霜臺勢浮紅扶塔勢山光含翠間湖光偶然  
隨喜溪頭立洗鉢僧來話夕陽

灤州

翠巖如畫護重城亭堠無煙久洗兵路入臨榆疑塞盡水  
經孤竹覺流清獵魚隊小尋西堰射虎山高問北平風雪  
一鞭歸未得海天愁煞暮笳聲

居庸關

雄關虎踞劃幽并險扼開平控北平萬馬邊聲通絕塞九  
龍王氣衛神京羣山西導秦城勢比屋東延漢戶名今日  
烽煙消斥埃也須因暇議屯兵

犖确聲中策騎前雙厓斷處響金鞭盤從石窟疑無路踏  
到冰沙別有天柳峪停雲峯寂寂桑乾落日水濺濺前山  
知是從圍地薄暮弓鳴嶺外弦

陳豐字蘭甫號東塾番禺人道光壬辰舉人候選訓導

### 賜五品卿銜

詩話東塾兼通羣籍天文地理樂律算數古文駢體  
詩詞篆隸真行靡不殫究學主溝通漢宋於漢宗鄭  
君於宋宗朱子博而能醇所撰東塾讀書記詳言經  
學源流正變並博考周末諸子流派表章漢晉以後  
醇儒尤諱諱以開風氣造人才  
爲先務粹然爲咸同間一大師

### 贈于晦若

桂海奇才出英鋒不可當問年甫終賈讀史似錢王虎氣  
必騰上言談宜善藏參天二千尺渾不露文章

感舊

先師程侍郎雄文兼碩儒昔於侍坐間問我讀何書我以  
漢書對又問讀何如我言性善忘讀過幾如無師言不在  
記記誦學乃粗豈欲摘雋語以資詞賦歟漢室之興衰班  
史之規模讀之能識此乃爲握其樞廿年記師說書以置  
座隅

題潘鴻軒茂才百花卷

拈出五色筆齊開百種花暄之滄海日爛若赤城霞草木  
誰能厭詩書信有華騷壇推巨手莫認畫師家

秋夜卽事

中秋一醉不嫌遲莫負今宵把酒卮人有幽懷愛深夜天  
將明月答新詩四山雨氣全成水一桁樓陰倒入池野鶴  
閒鷗都睡了此時清興有誰知

姚承豐字玉農天津人道光壬辰舉人議敘知縣有稔  
齋詩草

袁浦

舂鏞經營苦帆檣日夜過水爭塵市繞官比士民多南北  
舟車界淮黃裏外河年年資鉅帑保障竟如何

登玉峯山

羣玉浮浮展畫屏遙村近郭總堆青琳宮縹緲撐孤塔石  
磴縈紆界小亭松檜有聲疑雨落巖巒無主任雲停山僧  
漱茗殷勤甚相約何年此再經



吳敏樹字南屏巴陵人道光壬辰舉人官瀏陽教諭有

泮湖詩鈔

詩話國初古文家推侯魏汪姜自望溪以義法倡後進海峯惜抱繼之海內遂有桐城派之目南屏崛起湖湘亦推挹望溪而於劉姚二家皆致不滿其論文大旨具見於與歐陽篠岑書中詩則取徑陶韋間亦參以杜法關中徐太常法續典試湖南搜遺卷得六人南屏與左文襄在焉粵寇起湘中人士多投筆從戎驟致貴顯南屏獨閉戶著述轉徙兵間不廢嘯詠所著春秋三傳義求詩國風原指諸書皆確有心得異乎尋常經生家言

七月十二日攜兒姪西村觀穫示之以詩

人生須飽腹農事其本根安坐而取食愧恥何可言我曹  
蒙祖澤以有此田園儒衣嚇鄉里道義未能敦秋成屬登  
稼枷板響朝昏閒攜小兒子觀穫前山村割把汗流體打  
取兼勞煩豈敢惜艱苦顆粒天地恩兒曹嗜果餌粗飯意

不存那知養命主農夫爾宜尊古人出躬耕立功彌乾坤  
游閑了一生不如犬與豚

游綠溪菴贈種花僧石巖

綠溪還幽盡遂得孤寺門誰言古驛近有此花水源山僧  
不種桃側地置小園窅爾丈室外品留香色繁客來但看  
花欲語未許煩乃知巖師妙說法在無言日斜鐘廊下欲  
去留題痕常尉五字絕吾詩焉可存

甲辰都下留別春潭伯喬兩弟

蘆溝橋上行塵起蘆溝橋下惟流水明朝相送至蘆溝二  
子且留吾去矣昔年意氣來上京赤手欲攫公與卿已經  
三載輒連敗自顧一生何所成匡時宇宙要有人山林骨  
相原吾真田歌社酒自爲樂澗草巖花未是貧洞庭眼前

煙水足願買南津湖一曲結茅作屋具船游有魚可羹書  
可讀二子努力干聖朝豈宜從我分漁樵臨歧莫作可憐  
狀看我新詩似解嘲

與西垣同宿岳陽樓上酒後成長短句並示冬谷道人

我昨瀏陽作學官飲酒酣睡俱所安惟恨醒時欲走無處  
向旋轉屋內牆壁不得寬又恨當杯雖醉乃未快眼中伴  
對人實難爲此急歸來脫身何疑哉江湖浩蕩舊家宅白  
鷗相見猶無猜何況今茲共君裏被宿樓上道人老方嗜  
酒同疏放萬千氣象晝夜一欄前不知仙人游戲蓬萊復  
何狀莫生世外心且作世中語擺落一切緣神仙或吾許  
道人閒樓置小窠強眠二客餘無多蛟龍半夜驚風雨奈

此樓中客夢何

丙申正月六日舟發郡城

新日一湖霽張帆始郡城雲開天色喜風迅水郵輕破浪  
思宗子題橋笑馬卿猶看度年樂那免別家情

初夏書事

雨送春歸始放晴風光初夏好逾明林花過盡新生竹院  
鳥嘯殘仁熟櫻自檢方書醫小疾頗從田父看深耕西莊  
勝事猶多負開徧將離賞未成

後山書堂西北隅小屋數間因勢改構而遠爲樓延  
引湖山驟成勝賞外治花圃列植名卉皆余弟半  
圃之所爲也余題之曰芥子山房其樓曰聽雨云  
地原多勝解人難異境初從法眼觀與世隔塵纔屋角爲

花分國出林端堂樓仿畫窮諸相村舍和煙弄一丸曾笑  
粗疏陳仲舉掃除吾室自便安

片影微茫是洞庭同杵曾注道元經煙中乍識孤帆白樹  
外遙來遠渚青世界祇從空處見江山全爲主人靈對牀  
夜雨山來好莫問何時儘共聽

江陵懷古

紀南休歎霸圖空往跡人猶識渚宮游獵近馳雲夢澤觀  
兵遙踐陸渾戎細腰貯寵矜秦女長鬣延賓傲魯公末代  
孤臣賦哀怨猶然大國有雄風

莽蒼江山百戰昏興亡何只兩東門梁家偏仄那須惜高  
氏崎嶇未足論獨許蘭成沿宋宅思招子美合湘魂前朝  
相國猶人傑目極艱難感激存

鄒嶧賢號敬齋江西樂安人道光壬辰舉人官新城教諭有坡硯山房燼餘集

松坪夜坐

幽溪日已夕月掛孤松頂泉流咽石崖樵語下煙嶺竹陰三徑涼雲氣半壑冷風露皓然下林梢滴清影萬籟各已寂吾心亦虛靜山空得太古何事著塵境坐久不知夜疏鐘發深省

陳樂光字太霞武陵人道光壬辰舉人官善化訓導有太霞詩鈔

江鄉晚步

輓沙隄路樹迷離一綫斜陽欲暝時紅蓼花明青箬暗烏鴉影疾白鷗遲炊煙透瓦寒杉屋山色窺人苦竹籬誰寫

秋容助吟興碧天無語暮雲知

項鴻祚字蓮生錢塘人道光壬辰舉人

詩話蓮生工倚聲手定憶雲樓甲乙丙丁彙清空婉約足與靈芬館詞相伯仲詩不多作嘗曰予詞足與余詞角詩不足存今附刻詞彙後清音雅思殊不在松壺題畫詩下

感懷

豈有高軒客過門小庭花落自黃昏黃金盡後餘詩債白  
袷閒來賸酒痕文字祇今工作祟故人幾輩待招魂不知  
眉黛療飢否且著相如犢鼻褌

湖上卽事

孤嶼平地接重城一水環湖明疑浸日雲薄不遮山樺柳  
如人弱嘒鶯笑客閒畫船乘兩漿酩酊載春還

秋夜寄遠

花遠靜冥冥秋聲已滿庭風連萬戶竹月澹一池星夜永  
鐙先盡窗寒酒易醒南飛有征雁寥落不堪聽

陳超字元圃歷城人道光壬辰舉人有元圃詩鈔

鵲華橋雪後小眺

殘雪積成岸明湖凍幾層煙輕露城影冰斷出魚罾枯樹  
老逾聳遠山寒自凝飢烏憐息羽不復舊飛騰

溫訓字伊初號登雲山人廣東長樂人道光壬辰舉人  
有梧溪石屋詩鈔

詩話伊初自言半生精力多在古文其次則詩弱冠  
時卽以二十年後當作陳無己自厲詩沈鬱壯浪出  
入諸家而歸宿於杜韓有句云我文實學韓而無韓  
質存我詩願師杜而與韓同源蓋自道淵源所出也  
最爲伊墨卿所知謂其詩本漢魏得力尤在明遠古  
之傷心人也雖澹泊擬陶瘦削摹杜要非山林中人  
宇宙皆吾事慷慨希昔賢  
此何等抱負誰知之耶



碧玉潭

古潭涵虛無玉碧濯娟娟窪然闢水府疑有蛟龍蟠蒼山  
環其外峭壁摩穹天倒影下空洞宿鳥不敢眠黝黑灣環  
底欲沒百丈絃始信淵冥內諸象杳無緣晝涵羣峯靜夜  
浸星月寒藤蘿織翠縷怪石吸驚湍元顏淡深碧空際曳  
綠煙造幽自太始混沌劈其端對此心神寂炯然欲入禪

遠游吟

弱水西北流滔滔去不息人生莫遠游征途蒼莽何終極  
西莫上隴頭山隴頭流水聲淒寒南莫下瞿唐峽瞿唐峽  
上舟如葉更聞邛峽坂九折縱有騏驥行不得雪山嵯峨  
高插天行人見此凋朱顏遠游吟苦悲心君不見田舍翁  
守空谷足局促一生裹頭不出門室有兒孫倉有粟

秋思

流螢點點度高樓樓上西風雁唳愁月影荒涼孤客夢笛  
聲橫裂四山秋梧桐露冷蕭蕭落星斗天寒作作流關塞  
蒼茫望不極幾人齊唱大刀頭

放歌送孫雲帆歸江右

君從西江來曾否吸盡西江水我居南海濱南海珊瑚手  
曾採五羊城中百尺樓樓上有客長歌謳昂然直入一奇  
士要與此客同翱翔傾山倒海吐雄談談豪不怕庸兒慚  
有時酒國力爭霸齊盟狎主心非甘忽而欲拔赤龍鬚忽  
而欲駕奇肱車異思幻化出天外江東獬兒眞嚇余我昔  
與君同上越王之高臺海天陰霾掃不開狂歌大笑說霸  
王黃屋左纛何壯哉君乘牂舸萬里濤鼎湖星巖供調嘲

居然欲以傲狂客，心不能不思一廛。昨日徑登白雲去，青  
天九龍挾風雨。安期招我入雲中，翩翩鶴駕峯頭駐。腳踏  
摩星嶺，目極滄海波。波光萬道掣金蛇，巨鼇如山鼉屬而  
鼇拏。我欲釣此鼇，惜無五十牯。餌徒咨嗟歸來詫，君大快  
事。君言夜夢海神陳百戲，盍往觀之。遂吾志，北風一夜裂  
破屋。有母倚門望歸速，人生行止豈自由。歸去且謀升斗  
粟，我有寶刀三尺長。脫以贈君君束裝臨行，且爲盡一觴。  
海天萬里空青蒼。

觀音巖

蒼崖千尺插江立，水府沈沈吹波急。太古何人刻石腹，天  
臍地肺相呼噏。我從峽山古寺來探奇，已覺心顏開英州。  
又復覲此景，坐見絕壑生風雷。山僧導我登古洞，磴道詰

曲如入甕時當盛夏苦流汗及到漉漉衣忽凍青蓮湧吐  
正中巖大士踞之何巉巉石乳倒垂參差出輪囷其色皆  
黝黝吁嗟嶺外富靈窟崆峒七星爭突兀不如此巖逼龍  
宮清寒氣已入山骨

二月二日作

雨歇靜羣綠微風向晚柔野村寒瓦溼炊煙鬱不流都養  
亦何事鶴立望江頭沙平白若雪水淨碧於油竹塢喧栖  
鳥樵徑見歸牛幾年勞遠役及茲始息陬素心澹無著山  
齋潔以幽擬伴荷鋤老社事宴春秋

言友恂字雲笙湘潭人道光壬辰舉人有琴源山房遺  
詩

夜登空靈岸

大江夜流深懸巖當我前何人摩怪石置茲千尺巔老龍  
喘開口走避秦皇鞭到此不得闔吞吐生雲煙帝恐渴欲  
死昂頭吸百川神工鑿舌底噴薄華池泉白日古不到沈  
沈通九元是時悲風動波濤暗無邊恹恹百靈集瞑坐驚  
老禪陟降已干險冥搜不敢先歸舟靜人語恐有癡龍眠  
悵然此靈境結想躡飛僊

題魏布衣致陳恪勤書次沈栗仲大令韻

恪勤官江蘇時忤總

督噶禮劾繫鎮江特旨宥之命入武英殿修書除  
夜遣人市米潞河牙人魏思明詢知是陳太守曰  
廉吏廉吏贈米十石而返其值并致以書略云屢  
有人自江南來知公以國民爲心故有前此之遇  
不過是造物者成就英雄以資國用耳從來聖賢  
道大難行自今以往終始如一方見聖賢本色等  
語公訪之則去不知所之唐友石得此書於公之後裔云

滄洲先生眞丈夫睥睨權貴如庸奴聖明昭鑒臣不孤九

死一生脫囚拘長安風雪歲逼除車聲檻檻來蓬廬使者  
出札徑尺餘論議不數鴻都儒將以白粲明區區願公一  
節保厥初斯人爲誰市井徒適館授粲非阿諛索之渺爾  
隨鷗鳬心繫魏闕身江湖座間何人捋長鬚軼事往往流  
粉榆鄉人傳公微時有梓人陳姓識公必貴期異日相從  
但須作第一好官公許諾後諱之任一言一動陳必  
伺察規輔翼盛德當非誣此帖古意猶黃虞山中儒生儻  
石無誇食糠覈肥不癯貸粟監河計良迂索米仁祖徒煩  
拏但願遺天下食如賜酺坐見春陽一氣迴槁枯茲志未  
遂長嗟吁得錢且就村醪沾青天白雲自卷舒底用咄咄  
空中書

偕譚次山訪張丈謙菴不值

江鮑當時體流傳遂至今廿年仍旅食三歎有遺音花鳥

春城麗魚鹽小市深閒雲無處所寂寞對雙林

二妙吾何有空懷江上樽春雲低渡水草色細侵門坐覺  
溪山晚閒聞鳥雀喧寥寥千古意浩蕩欲誰論

次韻黃山人送春

落拓青袍歲十周韶華如此鎮生愁天連芳草迷春望紅  
到斜陽但酒樓別恨難邀花共語閒情不逐水東流自憐  
去住無長策可識豐城寶氣浮

汪元方字嘯庵餘杭人道光癸巳進士改庶吉士授編  
修官至左都御史贈太子少保諡文端

葦簾

蒙茸織出緯蕭工不羨蘆花颺碧空秋水雙扉寒浸月白  
雲一桁細篩風攏來雪影光明界照見霜花冷淡中自是

詩人瀟灑處白鷗鄉作主人翁

孔繼勳字熾庭南海人道光癸巳進士改庶吉士授編修有嶽雪樓詩存

懷羅浮

蓬島南飛日迷離四百峯羅陽一彎水華首幾聲鐘風雨空遙想神仙不易逢何時恣來往天外數芙蓉

焦友麟字子恭號鐵珊又號笠泉章邱人道光癸巳進士歷官刑科給事中有鑑舫詩存

弔孫白谷尙書並題遺像

兵潰潼關恨不禁那堪覆轍又重尋恩深不共熊袁死事去難收賀左心夜雨行營悲冷竈秋風戰血上衣襟羽書莫怨飛催急天意蒼茫歎到今



流涕登壇想誓師傷心裹革竟無屍一門血化殷家井六尺孤存趙氏兒祠廟全家馨俎豆丹青異代仰鬚眉遺編定有龍蛇護正氣長存信國詩

安詩字仲依號博齋金匱人道光癸巳進士授兵部主事歷官給事中有飛香圃詩集

點易臺

點易臺邊路荒荒蔓草茸能留太古石猶有六朝松幽磳鳴寒筑疏林閣遠鐘泉齋今不見憑弔夕陽春

謝文節遺琴爲新安吳素江作

精靈原不死三尺賸琴材天地紅羊劫江山白雁哀孤臣餘涕淚故國久蒿萊好和竹如意冬青無數開

吳昆田原名大田字雲圃號稼軒江蘇清河人道光甲

午舉人歷官刑部員外郎有漱六山房集

潤臣將之官武林繡山餞之於公邸同人分韻賦詩  
並乞吳君冠英繪圖以紀得惜字

杯酒欲爲歡離懷那可釋識面三十年始自相公宅立雪  
依山陽函丈聯講席五載中書省出入同左掖仕宦先氣  
節交游豈形跡兄事重增羞師資實懷益借書經讎校催  
詩急逋索每從問掌故星斗信手摘有時出郊原並轡振  
輕策鬱蔥樹森栝突兀塔立石回頭見蒼鹿病卧傍木柵  
歎此山林姿輕作風塵客沽飲上市樓明鐙照霜夕更深  
不言去往往遭眼白悄寒啟深堂戶大眾辟易一斗不盈  
觥春色明琥珀行樂愛及時憂來忽相迫將母我南歸泣  
血目空赤君則胡爲者暫脫微垣籍風起搏桑陰霧漲波

斯舶城郭付蒼茫何處王喬舄陟岵驚心神填海賊魂魄  
相見兩無言中情永脉脉長沙冬月書高堂幸清適祿養  
豈易謀歡承庶無數武林好湖山詩人所共癖春雨米家  
船秋風謝公屐矯首五雲中天涯儻咫尺主賓各繼繼悲  
愁雜笑劇且復拌一醉此日足可惜

蘇州弔徐莊愍公

繫纜城邊瓦礫堆當年歌舞錦帆開倉皇揖盜誰沈毒  
慨臨戎必倚才早有豺狼酣卧榻竟看麋鹿上層臺尙留  
一死垂青史西市何人亦可哀

紀夢

驅車出我里周道方倭遲半塗悵阻絕舍車行委蛇忽然  
入廣廈碧樹交階墀轉轉得湫隘荒歲不可治就中一仄

徑仰首山嶽巖沿緣升其頂怪石愁伏獅不視濁浪高風  
帆莽東馳北流界一綫水色清漣漪號咷出水底入耳心  
驚疑旁有二士語落際固如斯深淵萬萬丈一羽沈若遺  
墮落果何代終古聲在茲聞之增歎惋卻立神爲疲打窗  
夜雨急蛩響徒傷悲

端木國珞字子彝又字井伯號鶴田青田人道光癸巳

進士官內閣中書有太鶴山人集

阮芸臺曰處州山川險阻余試青田畫虎賦得端木  
子彝才調軒新得六朝真意歸語秦小峴觀案曰此  
青田鶴也檄之來杭州真意歸語秦小峴觀案曰此  
天台雁宕諸詩尤極奇麗余有句云誰是齊梁作賦  
才定香亭上碧蓮開括州酒  
監秦淮海招得青田白鶴來  
詩話太鶴博通經籍尤深於易兼治堪輿家言詩文  
汪洋恣肆受知阮文達嘉慶戊午舉於鄉大挑得縣  
令請改校官秉鐸歸安十五年道光中宣宗改卜  
壽陵章佳文毅以所著地理元文注進因召使相地

叙勞授縣令文毅爲辭改授中書及文達自雲貴總督召入閣癸巳主會試太鶴始登第年六十餘矣復除縣令呈請就本班蓋前後三辭縣令云集中有詩日儒官行且老讀易白蘋洲帝有萬年慮臣無一旦謀詔書行驛馬祖道出江鷗期及長安日黃山禁樹秋旌召虞人賤輪徵處士虛才疏違世用力薄詣公車帝重蒼生問臣輕黃石書何時塞明詔歸守卞山廬正應召時作也

曉發芙蓉村

飛翠失空山游夢兀然醒人語夜堂深簾白鐙猶炯寒暝  
戒衣裝共取芙蓉徑綠樹脫蒼煙遠媚溪光靜鳩嘯雨後  
聲山認雲邊影村引碧陰高壑度香風永雁峯落何處四  
十九盤嶺

斤竹澗

巖幽猿始嘯天光發林晏早涉芙蓉溪憩此斤竹澗白雲  
翳喬柯青煙裊修棧苔明沙泐交石麗淙流間露壁灑松

清風潭落花眩暎惑漁者重跡懾樵人慣攀翻恣纂笈凌  
厲厭葭薺菰蒲養谷神薜蘿恥塵宦游山昔何人越嶺此  
流眄枉挈崖上屐未眺湖中雁仙事昧交臂靈山邈對面  
昔艱今在茲窮賞寄余慢泉聲引天高石色到海幻元中  
無物存意外非人辦寄言進帆客孤嶼焉足戀

能仁寺

靈谷鉢盂大中藏金仙景巖構發自然蒼翠拔幽迴山花  
纓絡相水石光明頂寺前千佛峯一峯一佛影下有白眉  
僧禮佛日常暝衣履蒼苔深煙火白雲冷空音叫幽禽清  
香生苦茗因緣境俱寂尋翫跡惟靜過午水聲麤雨滌山  
容醒

常雲峯

對嶺天在山白雲滿晴日漏出雲影中青蒼插峯足峯足  
倏復冥天首芙蓉矗東峯雲是松西峯雲是瀑雲天一東  
西互見峯峯綠卷之仙人衣孤映睂白鵠儵忽海帆張蓬  
蓬漲虛壑雲態何變幻靈峯爲舒縮宕雲七十峯藏之一  
峯腹其下海穴蟠龍氣各相屬每當大火交一縷噓萬族  
無雷潭響奔不雨林光沐明晦勢多端雷雨亦翻覆猿鳥  
膺有聲各不辨崖谷長看雲斷邊僧寮白煙續看雲是看  
峯何在循其麓我看此峯雲隔嶺妙相矚試坐馬鞍頂快  
覽過朝旭

錢江晚行

海角孤雲白澄空萬頃波江聲迴夜月帆影上秋河岸出  
魚龍伏船鳴雁鷺過明朝看山色知是富春多

姚江懷王文成

下厯金元上漢唐書生事業最非常輕兵出手擒吳淝大  
智全身用呂強絕代危疑消華室半生閱厯在龍場諸儒  
安坐太平後辛苦良知辨短長

早行

衣上星河白天低秋路明戍煙生馬首村月落雞聲沙市  
人爭集輓車客半程朝朝共鈴鐸辛苦道旁鳴

獻王祠

孝景分封尙儼然漢家難得此親賢名王造次稱儒者天  
子荒唐事列仙傳我遺經劉子政壞人雅樂李延年後來  
一聽斑車入空記河間姪女錢

留別劉鷺羽



西笑相逢憶古歡，驅駒催唱且盤桓。  
入關師自因盧植，被褐交誰得井丹。  
歲暮河梁人結髮，天涯風雨日加餐。  
黔山漸水東南望，容易相思識路難。

送別知君倍黯然，團圞心事到樽前。  
生兒羊祜雙環少，贈婦秦嘉一鏡圓。  
黃犬大家書通萬里碧，雞春夢隔三年何。  
共挈蓬山侶，不住天南住日邊。

唐小忽雷爲劉燕庭

喜海

作

韓晉公入蜀以逆邏檀

雷進入內府，文宗時內人鄭中丞善小者，以匙頭  
脫送崇仁坊南趙家修理，後甘露之變，中丞以忤  
旨縊投河，權相舊吏梁序本在昭應別墅垂釣，援  
而妻之，後黃門聽其琵琶聲，復召入，康熙辛未，孔  
東堂民部見之，燕市購得之，龍首鳳臆，領下有小  
忽雷篆書，頂有臣混手製恭獻，建中辛酉春，正書  
十一字，皆嵌銀，民部坐客樊稜，稜善音，彈此東堂刻  
二絕於軫上，曰：古塞春風遠，空營夜月高。將軍多  
少恨，須是問檀槽。中丞唐女部手底舊雙絃，內府  
歌筵罷，淒涼九百年，今歸劉燕庭。

平章軍國妙丹青手製沙邏蜀玉形何似河西楊節度  
覓裳進曲雨淋鈴

馬上雙絃進御杯雲韶仙部後庭催逝波一去如紅葉不  
信人間有鴟媒

南趙檀槽聽裂絃黃門消息漏中丞廬江小吏民間曲寫  
入宮牆怨不勝

霹靂無聲闕玉宸傳頭零落一千春樊稜變調淒涼甚聽  
出唐宮玉筍人

河間漢君子館輒爲苗仙露

學植

作

驅車有客河間道抱得殘經映衰草禮士賢王漢古風昔  
人已往今人老傳詩博士毛公里築館猶聞說君子花輒  
兩字墮荒郊拾出蒼苔是誰氏苗君苗君生此間蟲魚事

業寸心閑古文日夜磨風雨芻玉駟場寶一斑黃金臺摧  
空幽燕荒唐陳事都可憐苦求東海童男藥工數西園姹  
女錢好賢誰識眞儒者後來剩有開元瓦蒼茫回首日華  
宮客到斜陽多駐馬苗君手拓細臨窗土質霜華墨滸濃  
金絲魯壁無人得白首葩經憶此邦

許槲字珊林海甯人道光癸巳進士歷官江蘇督糧道  
有紅竹草堂詩鈔

詩話珊林與弟辛木篤志經術精研六書癸巳同榜  
成進士而辛木冠南宮一時稱二難焉共治校長遺  
書欲取周秦以來有韻之文參稽  
此校纂說文解字統箋未及寫定

袁君松門歌

琉璃劃天開芷村松雲如蓋飛古門千年老蚪作人立脂  
香著地垂秋痕袁君倚巖發長嘯竹根刻杯吟紫瑰琳書

貝冊儘消受殘山賸水誰與論有時快念賈島佛二十八  
宿胸中捫粲花何人識此意至今惟有碧雞存

許楣字辛木海甯人道光癸巳進士官戶部主事有真  
意齋詩存

題江弢叔詩集

造物太無賴何心生此才寒飢出詩骨烽火爨琴材宰相  
能捐粟窮交爲酌壘猶然士不遇二鳥賦堪哀  
古錦囊忽至韜之深復深梅花間一物山石後孤吟此手  
故無敵彼蒼元有心天梯不到處特縱謫仙尋

張熙字字玉田義眉人道光癸巳進士歷官安徽按察  
使有花洋山館詩鈔

詩話玉田官皖臬時值粵匪東下以一旅駐小孤山  
及沿江失守坐望吏議李西樞序其詩集曲爲迴護

則鄉里之私非公論也玉田嘗選七家試帖詩盛行於世其所作古今諸體皆無意求工自成馨逸

登我眉山用李青蓮詩韻

導江來岷山嵯我實無匹瑤草雜丹砂靈異靡能悉其間  
數百里我眉尤特出中多綠字書皆言長生術仙人紫鸞  
車手抱瑤姬瑟碌碌塵土中俗緣誰得畢坐令多名山一  
一對面失感此信恣意林泉娛暇日

言陟茲山來青翠邈難匹十步一長吁奇險不可悉引領  
望中峯雲間沒復出聿想山中人定有王喬術忽然微雨  
過寒風吹蕭瑟行路豈不難奇賞會須畢回首眺冥濛前  
路忽已失夕煙開晚晴亂山照斜日

平明登絕頂身與眾眞匹天風捲頽雲諸山了可悉瓦屋  
峙其前雪山從後出老佛雙瞳方授我清淨術是時山寂

然泠泠汎瑤瑟瑟聲亦旣歇佛言猶未畢山中无是非世  
間有得失我親聞此言皎如見天曰

雙鶴西南來盤空結儔匹懸巖下无地萬古人罕悉中有  
兜羅絲如鶴飛飛出我欲乘之起自試凌空術鳳皇導我  
前虬龍爲鼓瑟忽覺鍾聲動僊樂訕然畢再拜語諸眞長  
願无相失浣衣赤城霞晞髮搏桑日

桂超萬字丹盟貴池人道光癸巳進士厯官福建汀漳  
龍道有養浩齋詩集

### 紡車行

江南多木棉輕暖勝齊紵慈母勤夜紡孤鐙懸闌干皚皚  
潔白華照見冰雪肝綫斷使復續車毀使復完車影似明  
月一輪何團團月輪四更落車輪仍盤桓綫影如銀河九

折迴波瀾波瀾無已時得成布一端裁布製兒衣賣布供  
兒餐兒食日二盤母食日一簞兒身著新襖母身蘆衣殘  
時紡時課讀書荻呼兒看計偕兒北行拜別具儒冠門外  
牽兒裾十指盡成瘕不畏操作苦翻畏關山難母心如飛  
轂母手如轉丸病亟牀蓐冷還慮兒身單命取車上綫縫  
衣寄長安衣綫長在身縫者骨已寒彷彿夢魂中軋軋聲  
未闌秋林聽絡緯飛鳴猶悲酸酸風吹淚雨此淚何時乾

祈雪

殘臘歲如客土脈乾欲裂以我徑寸心求天盈尺雪天高  
九萬程求之焉可得同氣或相感素心與雪潔蒼蒼如不  
信剖心甘自白

賈閬仙墓

我亦耽吟者何人肯鑄金孤墳留佛骨萬古此仙心老樹  
月痕瘦寒雲鳥夢深難逢是京兆塵世幾知音

沈映鈴字輔之號退庵錢塘人道光癸巳進士歷官部

州知府有退庵臚彙

詩話退庵官粵東蔣果敏公以循良特薦性  
方鯁居官廉介集中丁巳卽事足稱詩史

丁巳年冬卽事有感

頻年海上指櫓槍厝火還爭說太平獨倚贊皇嫺遠略豈  
知安石誤蒼生拜章但乞神靈護折屐誰驅草木兵一舸  
倉黃浮海去奇謀至竟未分明

資弼曾傳協帝廷天留南粵作藩屏能如公意材原少獨  
恃神憐夢不醒鈴閣森嚴誇靜鎮樓船拘繫歎伶仃尙餘  
宏濟艱難意未報中台隕相星



曹銜達字仲行號子安嘉善人道光癸巳進士歷官惲州同知署知府有聽鐘山房集

汀州試院雙柏數百年物也李鐵梅學使同年首賦  
一律余爲繼聲

獨愛清風倚綠陰託根豈必在山林敢因盤錯矜名節還對冰霜矢素心炎海蒼茫猶帶甲蘭臺颯爽此披襟眼中大樹飄零盡七字低徊老杜吟

舟行和鐵梅

金戈鐵馬共秋聲醺酒鐙前劍欲鳴人自寂寥灘黯淡疏星殘月遠山明

陳光緒字子修號石生會稽人道光癸巳進士官山東武定同知有拜石山巢詩鈔

閒居雜詩

入城買釵鈿渡江買錦繡問渠將何爲嫁女已及候薄俗  
重厚匱以此密婚媾豈無有餘家女多家亦瘦壻家不必  
貧女家不必富但視力所能百備不一漏嗟哉爾何愚甘  
以奢靡鬪嫁女盡嫁金毋乃計太謬不見劉凝妻裝遣散  
親舊

大夫三月葬士則僅踰月縣封有定期著爲春秋律今人  
惑堪輿選地葬無日野厝苦寒暑屋殯防諱出日久家或  
落窀穸已竭郭璞造葬書但求妥骸骨藉以博富貴兒  
罪豈容髮棺槨未入土譬如居無室死不如速朽聖言有  
爲發

越人多信鬼此風盛今日居喪延浮屠因鬼乃及佛釋氏

有何能云有懺悔術斯言若妄聽已犯異端律置親於有  
罪子罪先可殺近來取悅耳簫管雜鐃鈸黃冠更狂誕上  
表達天闕吾徒讀儒書覩此憤難遏伊川程夫子遺言當  
載筆

海外罌粟膏色如烏鴉烏因名曰鴉片論值貴錙銖初來  
到閩粵漸漸及九區吸食有定候不可一刻踰山肩日以  
聳凍梨日以癰彼方與友共人已將鬼呼或曰倭芙蓉採  
入醫家書療病屢有驗精神賴提扶不知能毒人毒深形  
已枯記否萬厯朝曾禁澹巴菰

古人重去國越俗輕遠游讀書甫及冠遽爲衣食謀飢驅  
出門去不憚道路修所營無他業刀筆多依劉非不供甘  
旨莫慰父母憂欲歸不得歸白雲空悠悠他鄉作羈客何

如田間叟終身在鄉里不知行旅愁團團聚一室至樂天  
倫求

孔驂贈舊館范麥恤故交助喪古來有誼薄雲天高未聞  
投瓜李反望報瓊瑤吾鄉遇親喪千金瓦礫拋親朋送障  
軸紛紛懸堂塲必以多金謝務使有餘饒不爾卽昧禮便  
來旁人嘲弔客有饋贈竟成市道澆我欲矯鄙習瑟柱難  
去膠安得定社約易俗先吾曹

河陽三百年德安十四世同居不析產能法張公藝昔人  
尙孝友子孫知好義斯眞家之肥一門萃和氣吾越俗不  
古同堂居不易甫畢向平願遽分陸賈筭善哉明鄭濂曾  
向太祖對不聽婦人言勝書百忍字

吾鄉重事神年年作大會屆期神出巡數里盛儀備楊柳

映春旗落花飛紫蓋簫鼓鬧中流香煙聞上界魚龍各水嬉咸集罔弗備遐邇人若狂舟楫滿湖瀨士女競華飾兒童結小隊古者祭田祖禮亦隆報賽今也尙繁華毋乃太浪費

興濟早發

客鐙照壁秋夜昏月出疑曙車趣行襪被登程續殘夢十里不聞晨雞鳴人行未及曉我行行更早世間萬事貴爭先日暮途窮誰爲憐

王錫九字蘭史汾陽籍浙江山陰人道光癸巳進士官吳縣知縣

詩話蘭史歷宰嘉定昭文元和青浦諸縣所至有聲在嘉定審練祁南北雙塘建義倉助築鄰縣寶山海塘在昭文修文廟舉梅里善堂在元和青浦正海疆不靖設防弭盜及真除吳縣又遇大水勘災治賑皆

有惠於民裕靖節奏薦召對駁駁大用以憂  
去遽卒祀吳縣學名宦祠其子孫遂家於吳

### 霍山

作鎮雄三晉蒼茫最上頭千尋開巨嶂一氣拱神州雨蝕  
殘碑古苔荒故壘秋山形依舊在霸業付東流

### 豫讓橋

一溪煙樹冷蕭蕭殘魄憑誰唱大招終古英雄無片壤祇  
今國士有遺橋生逢知己身何惜死爲酬恩淚不消千載  
汾河鳴咽水西風吹作越江潮

### 藺相如墓

全憑肝膽固金湯豪氣眞堪懾虎狼完璧終教歸趙國奉  
盆那肯屈秦王威加函谷風雲壯功在常山日月光叱咤  
餘音聽未歇河聲鳴咽送斜陽

樊噲墓

不讀兵書不學劍狗屠別創英雄傳如何耳食紛紛者論  
功但說鴻門宴憶昔沛公入關中留居幾作富家翁威加  
海內志乃爾眞人亦與項籍同賢如蕭曹皆噤口孤忠獨  
奮批鱗手炎劉得失爭毫釐一言悟主功不朽秦任趙高  
咸陽亡卧枕宦者宜預防鹿馬之禍前車鑒排闥直入何  
軒昂留得河山四百載將軍雖死今尙在漢家本自薄功  
臣全軀不共韓彭醢區區勇力安足論祇有忠義能常存  
至今汾上西風咽猶是當年壯士魂

題吳縣葉漁莊司馬承桂五湖漁莊圖

萬頃湖光照讀書四圍碧柳更蕭疏平生領略煙波趣漁  
弟漁兄共結廬

依然人境絕塵埃最好扁舟一溯洄七十二峯青到眼夕陽紅處釣船來

姚承恩字桐雲號朗山天津人道光癸巳進士官承德知縣有朗山詩草

題王雲樵出獵圖

裘馬翩翩任指揮瑯琊世胄繼前徽披吟我欲圖雙照賈勇君還殺一圍荒草寒雲低大野淡煙疏樹冷斜暉舉頭莫射南飛雁恐有征人帶信歸

誰寫丰神上素綃書生意氣直干霄霜飛大漠蒼鷹健日落平原駿馬驕文思定能驚玉署壯游常自戴金貂歸來刺飲黃獐血聊作消寒酒一瓢

徐維城字綱伯號韻生直隸通州人道光甲午舉人官



貴筑知縣有天韻堂詩存

春風

春風變萬物不變鬱陶心夢熟還鄉路愁連匝地陰花時  
增悵惘桑土計深沈沙岸日初暝徘徊猶苦吟

尹藝字虞農騰越人道光甲午舉人廣東大挑知縣殉  
難贈四品銜有甘我齋詩藁

登黃鶴樓

鶴蹤一去古今愁如此湖山如此樓風景收來全楚月笛  
聲吹裂大江秋晉唐幾日皆陳跡瓊顙何年紀再游我亦  
有拳椎不碎攜樽酣酒最高頭

徐子苓字西叔合肥人道光甲午舉人官和州學正有  
敦艮吉齋詩存

詩話西叔工詩古文辭爲江忠烈曾文正所賞譚復  
堂幸合肥以西叔與戴家麟子瑞王尙辰伯垣同刻  
爲合肥  
三家詩

盱山試玻璃泉贈韓俊民

金鰲百尺勢崢嶸雲影泉光結伴行我似雲飛無定所君  
如泉水在山清依人轉覺他鄉好懷古誰知逝者情後之  
視今今視昔不妨高處共題名

畫松歌送吳引之還巢湖

江北久無畫松手作者昔數留晉江盛名早時動海外晚  
年流落偏伴狂日抱長松換米喫枯根敗鬣愁荒唐餘技  
兼能寫風雨到今尺素垂琳瑯昨見宋家兩株樹張在蘆  
簾最深處一樹拔地生狻猊一樹盤攫蛟龍垂波濤颯沓  
涼風颺使我坐久看移時晉江畫松得松骨此筆韻遠將

過之廬陽城中一尺雪昨夜吳生幾凍殺扁舟襍被意態  
雄歸帆笑指巢湖東便好相從理釣篷四頂山前楓葉紅  
冬晚同子固飲酒

歲晏人事艱百貨日翔貴今宵一斗春君向誰家貰城中  
十日雪流民凍俱斃卽此觴豆微了卻數口費粵南早瘡  
痍江東又烽燧假君席前箸請君盡大計勿謂食肉鄙建  
豎本不易油鐙凍虛壁朔風吼平地已矣復何言浩歌徑  
成醉

早春

早春殘雪在春意靜中知鳥路紅將闌魚牀綠漸滋攤書  
欣日暝枕石愛雲遲吟罷攀庭樹因之感別離

羅漢寺尋黃山人索畫不值因憩亡友嘯公精舍愴

然有作留簡山人

月轉禪扉老樹斜石幢薔薇影交加一龕西竺高賢像數  
筆南唐院本花淒切誰家鳴夜笛蒼茫隻履隔天涯懸知  
白髮逃禪客醉倒城東賣酒家

廬陽夜捷行贈江使君達川

廬陽夜捷烈炬紅露布連奏甘泉宮使君兵聲冠諸將輕  
裘緩帶殊雍容記昔曾在圍城中挾策兩謁中丞公中丞  
英偉人中龍使君眉宇春融融指麾綽有中丞風牙旗深  
處展高宴橙香蠟綠霜螯健野人喜極悲倒來曉析深杯  
淚如霰君不見荒城蕩蕩跡如掃縱橫瓦礫居民少髑髏  
滿地生青草君不見壺漿士女泣垂面愛說中丞舊時戰  
張巡死去賀蘭生痛殺潛山廟中奠驃騎連宵拜新命漢

廷不惜通侯印使君愛逐赤松游脊令原畔牽歸興爲君  
高歌歌斷絕悲笳吹落林間月

除夕前一日醉起呈江使君時使君以歲晏享士虛  
其左西向以薦中丞之靈旣畢奠使君揖余就賓  
位曰君先兄故人狀相若齒相埒也見君如見吾  
先兄矣余之識中丞以陳池州池州之死久而未  
明而其弟畢凡千里來尋兄骨又久而未至俛仰  
悲懷轟飲極醉不覺失聲哭率成二首呈使君兼  
留遲畢凡

虎帳森嚴忝上賓座中靈爽動星辰無端慟哭干戈禁多  
愧將軍恕酒人信國千秋青史在荆卿四座白衣新醉時  
錯認西臺路朱鳥歌終倍愴神

老向風塵賦八哀  
池州儒雅濟時才  
並時巡遠宜同傳  
入洛機雲久未來  
數載兵戈知己盡  
百年懷抱對君開  
天涯明夕同除夕  
好挽長河注酒杯

病中送王紫垣之徐州戎幕余亦反東山田舍

病久忘春盡  
鶯囀花亂飛  
夾淮新戰壘  
送老舊蓑衣  
西楚徵兵疾  
東林訪舊稀  
昨宵筵上月  
兩地共晴輝

姚燮字梅伯號復莊鎮海人道光甲午舉人有  
大梅山

館集

徐柳泉曰梅伯以絕人之資讀書恆十行下自經傳  
子史至小說傳奇旁逮道藏空門者靡不觀覽出  
交天下名士士無不知鎮海姚生中年人病忽曉悟  
取生平綺語十餘種盡燒之自號復莊間作道士裝  
注玉樞經自言有詩萬餘首遴之至三千程春海  
曰處境愁鬱故旨合風騷拓胸闊大故詞無庸淺  
潘四農曰傑於晉宋之意理尋常語別有蒼秀之境  
符南樵曰十疊十央再接再厲非儉腹冥心兩家

所能許海秋最

稱其古今樂府

詩話梅伯儻多才駢文詞曲繪事並工其詩千言  
鬱律言之務盡而耐人尋味者轉不多見或以黃仲  
則比之尙  
非確論

煉丹峯下仙井

神淵不宅龍積蓄萬年雨醞作醍醐香與僧養清苦落葉  
秋不乾雲漿滴丹乳一淬冰鏡光山鬢靜相嫵石罌懸到  
根大星浴如炬但照鸞鳳游不照螭蛄語

南轅雜詩

崇封昔將相今爲居者田子孫已早隸表字猶如椽樵斧  
及松枯涼蔭愁夜鵬其下禾芑芑風色故相妍松枯無根  
株禾葉過人肩盛衰視氣化安問愚與賢

二鼓黃壘堡三鼓香城村旋風颭輪角沙葉爲蔽昏大河

莽東注石牖西營屯奔蹶不受役縱性投云渾巡卒互譏  
盜擊柝催閉門巷火漸稀滅防肅及犬豚居常慎動止一  
息堪自捫麟虎各山藪於我何仇恩

仰面月如水一瀉千里明照君樓上頭照我沙中行樓高  
一延望莽莽山川橫不愁阻汝目但愁阻汝情汝夢儻能  
來吾夢茲伶仃北爲樂陵縣南爲交河城

朔風送征馬飄瞥來鄆州攬衣愜朝爽縱目城南樓白雲  
在梁父零亂不可收海煙動雲隙岳上青浮浮汴京岬西  
控誰云風馬牛天門劃徐泗指顧通南郵梁唐割其險乃  
弱東諸侯悲歌弔台輔利病今誰籌

曉起

天風吹客醒海氣逼鳴歸廢圃宜秋綠荒山得晚暉渴時



逢酒熟病久與書違莫動勞生感無勞是息機

聞江

開

客淮上未歸寄五律三章

潦倒廬江客中原一騎游姓名關吏熟文字路人求自負  
心能壯何知鬢易秋西風近峻厲勸爾且歸休

開府畫堂高懸鐙看寶刀黃金彫駿色白日閃鵞毛氣折  
三河下才兼萬象勞榛山多虎跡我爲誦離騷

命世如君幾艱難得一官待徵無束帛歸釣有長竿水涸  
魚苗盡天空木氣寒嗟嗟孤雁影中道尙漫汗

臨平關曉發

颯颯西風動曉光淒淒蓬背有嚴霜萬山落葉趨平野遠  
海垂雲見故鄉凍溷飢鳧窺淺蘄寒天微旭潤枯桑孤愁  
任逐南潮去未敢郵程問短長

中山店旅夕

東極雲山負嶧防西來煙樹接茲陽大河風薄星芒白遠  
海沙迴月氣黃草入原深春漸闊鴻愁塞絕夜猶翔乾坤  
蕩莽一孤客千里停車此夢鄉

城西廢寺

闌寂重門閉網絲我來叉手步逶遲廊眉煙銼茶初熟檐  
角風旛柳共吹苜蓿場荒僧舞榭杪擺堂古客捫碑誰從  
佛閣敲疏磬冷照沈沈鵠影移

對酒抒懷簡都門故人

隱憂不諒鬱成悲海國孤峯眇四陲酒味漸參人事變琴歌未覺古音虧空庭花骨蜚煙瘦窄地江流繞郭卑息影蝸居無弱夢龕檀刻像拜天隨

杜陵劇有死生哀小劫滄桑問大槐風雪輪蹄誰壯士湘  
巫雲雨賸荒臺故人贈缺掀眉看獨座清樽對影開醉意  
知憐新舄好吾庭幸不長蒿萊

市僧徒爭汗馬勞千秋史筆炯難逃青山舊涕忘蘿薜白  
地雄聲仗節旄頗憶烏臺依日近未愁隼逕過雲高佳人  
夙有椎埋膽袖底純鉤漫屈撓

惜我逡巡負所求縛車駑鈍不能騶竟容落拓師張翰幾  
見勦名悔許由黃蘗滿山飢雀苦碧桃橫鏡淡蛾羞擁書  
坐作專城貴一笑邯鄲夢裏侯

楊廷桂字冷漁號嶺隅茂名人道光甲午舉人有嶺隅  
詩存

小孤山

九水來同瀉此湖關門矗起鐵浮圖力撐頽浪功誠大高  
到層霄影太孤仙窟有門憑鼓櫂天梯難上孰攜壺繡鞋  
嬌娜凌波立招客情深遜大姑

韓超字寓仲號南溪昌黎人道光甲午副貢官至貴州  
巡撫諡果靖有韓果靖遺詩

詩話果靖少勵學剛毅有大志從軍得官初知貴州  
獨山州捕治劇盜有能聲胡文忠方守黎平招督練  
勇稱其雄心遠略深相推挹及文忠援湖北果靖獨  
留貴州轉戰建勳績累遷至開府粵寇入黔境回亂  
復大棘綱繆支壯心力俱殫旋乞病歸光緒初卒  
於里年七十有九黔民思其德俎豆至今勿替

#### 四壁

四壁蕭然似長卿半牀狹被覆裴橫縱逢樂歲仍毛食尙  
賴儒風解舌耕巢幕可憐忘酖毒登車誰是志澄清鉛刀  
利器因時見慚愧三年自不鳴

庚戌北歸湖南道中呈同舟邱培之先生

白波渺無際一舸任東西風飽孤帆重江寬遠郭低澤鴻  
餘敗堵戎馬聽征鼙

時湖南災民編野黔楚用兵

起共劉生舞聲聲午

夜雞

病中

九試匡衡一丙科誓憑百戰挽天河君恩留得沙場骨且  
買黃牛荷笠蓑

閒居

老覺耕耘好惟慚病未能學詩敲一字舉酒盡三升  
陂鼓黃披栗長腰紫漉菱攤書繩榻掃曳屐野原登洲遠  
棲孤鶴雲高看大鵬喜逢清晏日閒退便枯僧

晚晴移詩匯卷一百三十七終